

समे – 12:25 hrs.

<><><><><><>

PM Cent

प्रधानमंत्री नरेंद्र मोदी होरें आखेआ ऐ कि भारत अपने करसानें दे हितें कन्नै कदें समझौता नेही करोग। अज्ज नमीं दिल्ली च एम.एस स्वामीनाथन शताब्दी अंतरराष्ट्रीय सम्मेलन गी संबोधित करदे होई मोदी होरें आखेआ जे सरकार करसानें दी औंदन बधाने ते राई-बाई दे कम्में पर लागत गी घट्ट करने लेई उप्परोतली जत्न करै करदी ऐ। उनें आखेआ कि डॉ. स्वामीनाथन होरें भारत गी अन्नदाने दे उत्पदादन च आत्मनिर्भर बनाने दे आंदोलन दी अगुवाई कीती ते जैविक बन-सबन्नता कोला अगड़े बधियै जैविक शक्ति पर आधारित खुशी ते संदोख जिसी बायाओ-हैपिनेस दा नांs दिता गेदा ऐ, दे विचार गी सामने रक्खेआ। उनें अगगे आखेआ जे कृषि विान दे क्षेत्र च उन्दे योगदान लेई उंदी व्यापक तौरा पर सिफ्त कीती जंदी ऐ ते अज्ज बी उंदे विचार देश दे कृषि क्षेत्र च होआ'रदे कम्में च दिक्खे जाई सकदे न।

<><><><><><>

Udhampur Accident

उधमपुर जिले दे बसंतगढ़ इलाके च कांडवा थाहर अज्ज पेश आए दे इक सड़क हादसे च सी.आर.पी.एफ दे 2 कर्मिं दी मौत होई गेई ते 12 होर जख्मी होई गए। आकाशवाणी दे जम्मू संवाददाता नै जानकारी दिती ऐ जे एह हादसा उसलै पेश आया जिसलै सी.आर.पी.एफ दी गड्डी जेदे च एह जवान सोआर हे, सड़क परां रूलकिए इंहगी खड्डे च जाई पेई। ए.एस.पी उधमपुर संदीप भट्ट होरें दस्सेआ जे हादसे दे तुरत बाद पुलस ते मकामी लोकें बचाव कार्रवाई शुरू करी दिती ते घासलें गी अस्पताल पुजाया। केंद्री मंत्री डॉ. जितेंद्र सिंह होरें हादसे पर दुख प्रगट करदे होई डी.सी उधमपुर गी निर्देश जारी कीता जे घासलें गी इलाज दी हर मुमकन सुविधां उपलब्ध कराई जा। होर ब्यौरे गी बलगेया जा'रदा ऐ।

<><><><><><>

CM-Rabita

मुख्यमंत्री उमर अब्दुल्ला होरें श्रीनगर स्थित राबिता दफ्तर च कई सारे प्रतिनिधिमंडलें ते लोकें दे नुमाइंदें कन्नै गल्लबात कीती। इस दरान ढांचागत विकास, बपार-कारोबार, उच्च शिक्षा ते लोकहित कन्नै जुड़े दे कई मामलें पर चर्चा होई। विधानसभा दे कई सारे मिम्बरें फारूक अहमद शाह, सज्जाद शफी, एस.ए वाणी ते पवन गुप्ता होरें बी मुख्यमंत्री हुंदे कन्नै मलाटी कीती ते उनेंगी मुतल्लका हलकें कन्नै जुड़े दे मामलें ते मसलें बारें अवगत करोआया। मुख्यमंत्री होरें साबका मंत्री सज्जाद अहमद किचलू हुंदे कन्नै बी मलाटी कीती ते चिनाब घाटी दे विकास सरबन्धी मामलें पर चर्चा कीती।

<><><><><><><>

Railway-Minister

केंद्री रेल मंत्री अश्विनी वैश्वगव होरें आखेआ ऐ जे हाल च चालू कीती गेदी उधमपुर श्रीनगर-बारामूला रेल संपर्क परियोजना भारत दा इक बड़ा चुनौतीपूर्ण रेल प्रोजेक्ट हा जिसी कुल संसारी सतह दे सुरक्षा नियमें ते मानकें गी ध्यानै च रखदे होई तैयार कीता गया ऐ। आकाशवाणी दे जम्मू संवाददाता नै जानकारी दिती ऐ जे कठन हिमायली पहाड़ी इलाकें च इसी तैयार करना बड़ा इक चुनौतिएं भरोचा कम्म हा पर सब्भनै सुरक्षा चुनौतिएं गी ध्यानै च रखदे होई इसी मजबूत शकल देइयै तैयार कीता गेआ। 272 किलोमीटर इस परियोजनां च दुनिया दा सब्भनै शा उच्चा रेल पुल ऐ ते अंजी खड्ड पर बनाया गया रेलवे दा पैहला-पैहला तारें पर टिके दा पुल बी शामिल ऐ जेड़ा अपने आपै च इक मसाल ऐ। वैश्वगव होरें आखेआ जे एहदे निर्माण च 215 किलोमीटर संपर्क रस्ते न, टनल ते 320 पुल बी ऐन ते एहदे लेई 5 करोड़ ध्याड़िएं दा कम्मरोजगार बी लोकें गी थहोआ ऐ। एहदे च 66 किलोमीटर एस्केप टनल बी ऐ जेड़ी कुसै आपात स्थिति च बाहर निकलने दे कम्म आई सकदा ऐ।

<><><><><><><>

Dir. Agriculture

जम्मू च राई-बाई सरबन्धी मैहकमे दे निदेशक अनिल गुप्ता होरें कल सारे सरबन्धी प्रमुखें कन्नै बैठक लाई। इस दरान मैहकमे दे कम्मकाज, चला'रदी गतिविधिं दी अमलावरी दा जायजा लैता गेआ। बैठक गी संबोधित करदे होई निदेशक होरें पैहले सोयां तैयार रौहने, पारदर्शी ते जवाबदेई आहला नजरिया अपनाने लेई गलाया। उनें स्कीमें दी समें सिर अमलावरी ते मैहकमे

बशकार अंदरूनी तालमेल पर जोर पाया तां जे करसानें गी बेहतर सेवां हासिल होई सकन। उनें जमीनी सतह पर निगरानी ते उपलब्ध संसाधनें दे बेहतर इस्तेमाल पर बी बल दिता।

<><><><><><>

Doda-HGT

डोडा दे डिप्टी कमिशनर हरविंद सिंह होरें हर घर तिरंगा अभियान तैहत कार्यक्रमें दी तैयारिएं दा इक बैठक दरान जायजा लैता। इस दरान एह जानकारी दिती गई जे तिरंगा रैलियां सारे ब्लाकें च 9 थमां 11 अगस्त 2025 तगर आयोजित कीतियां जाडन। एहदे राएं लोकें च देशभक्ति ते एकता दी भावना गी बढ़ावा थहोग। 12 अगस्त गी समुदायिक हाल डोडा च इक व्यापक तिरंगा रैली कड़ी जाग। इस दरान सांस्कृतिक प्रस्तुतियां, प्रदर्शनियां ते जागरूकता गतिविधिएं दा आयोजन कीता जाग। डिप्टी कमिशनर होरें सब्भनें मैहकमें गी लोड़चदे इंतजाम करने दे निर्देश दिते न।

<><><><><><>

Dogri-Academy

साहित्य अकादमी नै बरें 2026 दे युवा पुरस्कार लेई मान्यता हासिल सब्भनें 24 भाशाएं च पैहली जनवरी 2026 गी 35 बरें तगर ते औहदे थमां घट्ट उम्मी दे युवा भारती लेखकें दिए कताबें गी भेजने दा साददा दिता ऐ। लेखक दी उम्र 35 बरें जां फी औहदे थमां घट्ट होनी लोड़चदी। दरखास्त जमा करोआने दी खीरी तरीक 31 अगस्त 2025 ऐ। होर जानकारी लेई इच्छुक आवेदक साहित्य अकादमी दी वेबसाइट www.sahitya_akademi.gov.in पर दिक्खी सकदे न।

<><><><><><>